

金華黃先生文集

金華黃先生文集卷第三十四

續纂三十一

墓誌銘

門人編次

項可立墓誌銘

予為項君可立銘其大父墓後六年而君卒又九年而墓又三年而君之子師周始以狀走京師問銘于予會予方有史事及得謝而歸又三年乃克為之君姓項氏諱詞可立字也其先自台之仙居徙溫之永嘉後復自永嘉徙台之臨海臨海故為章安縣今所居章安縣即舊縣所治也五世祖璣高祖惠曾祖駟當宋南渡初遭時多故並隱弗仕大父良材鄉貢進士予所為作銘者也妣瞿氏張氏父鼎迪功郎蜀郡虞公集銘其墓妣毛氏田迪功而上考諸前銘可見已初君之大父有德于里中人至今思之 國兵南伐偶為卒所得將剽及焉忽撓而曲易

以他及復然卒駭曰此天所保護必有積德後當生好人遂舍之而去及君之生質貌魁偉自少倜儻尚氣皆與大父類人以為好人之驗稍長卓然有志于古不妄與人交所造詣必一時名人嘗為詩持以謁天游陳先生孚一見稱其善學李長吉君蓋未之學特暗與之合耳時君甫弱冠天游謂曰子固他日之善鳴者觀其丰茸閒婉若明金翠羽流麗雲屏能稍加鞭辟入於義理則其緣飾萬物之情當變而為鏗鏘清廟之音矣遂介之見此廬翁先生森又介此廬見右堂陳先生天瑞而卒業焉既而歸讀書于嵩隱嵩隱者五世祖德處也去家僅一里所由山麓緣緣路上絕磴穿石扉而入群峰環合中更平衍清池方竹超然如在世外四方士友及里中子弟負笈而至者傾所儲以給之無少厭歲飢人多採草根木皮以食有虎出為害君移

文謂山神而逐之是夕虎至舍外據地大吼林風震撼崖石併  
落少選聲漸悲俄悄然無聞開戶視之屏迹去矣君歲修游息  
于其間者十年于書無不讀而爲好經學謂聖人好六經始以  
明人倫于道之常終以扶世教于道之變易首乾坤先陽後陰  
君臣之常道正矣終于濟未則陰陽失位非變乎書始于二典  
堯之遜位于舜君道之正也終以秦誓繼王者之誓非變乎詩  
始于二南周之以服事殷臣道之正也終以魯頌繼天子之頌  
非變乎至于禮壞樂崩則春秋不得不作首書元年春王正月  
正始也末書西狩獲麟示變也聖人之示變于其終所以俟後  
聖復常道于已變也又以爲六經之有春秋修道立教之義剖  
斷始明尤致意焉延祐初有 詔著取士令郡縣起居就試  
于鄉闈而君雅不喜效新進之士作科場語以求合有司繩尺

故屢試而屢却未始以得失為欣戚也君素為吳越間學者所敬服爭奉禮幣迎致而師事之久客于外行橐所有悉送于家以具甘旨一毫不敢私達官大人有欲薦之于朝者辭以丹老不可遠遊而止季弟某從君久遊既壯為之授室其費一以身任之永康胡先生長攜號康介休官而家益貧寓杭之青蓮佛舍以歿君夙為所獎重經紀其喪事甚力裒輯其遺文將刻梓以行而未果也中歲不踐場屋歸侍親庭杜門不出遇風曰清美間與一二勝流盤礴金龍峰上而寄情于漁釣人或繪為金盤釣隱圖其歆慕之如此嘗患渴竟以其疾至于大故君生于前至元戊寅某月某日甲子卒于後至元戊寅五月丙午享年六十有一臨將屬殯神色不亂語師周曰吾與爾永訣矣吾母垂曰在堂而不得盡終養之孝爾年甫及成童而不盡撫育之

思吾既為明時棄物以就磨滅爾當竭力奉吾母以及爾母厲志于學以無忝前人勉乎哉傷乎哉言訖而逝母哭之慟絕而蘇弔者皆哭盡哀俟殮畢乃退娶王氏後十年卒子男一人即師周陳氏出也女二人適王光讓黃應聰師周卜宅兆于臨海保樂鄉安仁里鳳山五世祖墓之側以至正七年冬十一月己卯奉君柩葬焉君所著有春秋纂義二十卷詩文若干卷藏于家君歿師周年纔十五凡狀所述多質于君仲弟某而得之也予與君為文字交非一日君生後于予而先予死予之庸鄙諱葦固不足任吾友不朽之託然以師周不遠四千里奉君治命而來有請業已心許之安可無以存掛劔之義乎銘以慰君亦以慰其嗣人云爾銘曰

天之生物其成實難胡底于成而卒棄捐有木于斯植被中野

由其萌芽至于祀拱沐浴時雨膏液也豐行柯布葉干雲蔽空人指其材可梁可棟工師耽焉乃不有中委而弗取老于丘園斧斤所斲山林之尊不侈其逢宜不謂命保茲歲寒順受其正于嗟乎君不幸類之全夫天年何成何虧鳳山之原墓草既宿輒哭書辭用慰幽蹟

呂府君墓誌銘

府君諱汲字仲修姓呂氏呂氏子娶為著姓而非一族人因以其所居地望為別居永康縣之太平鄉者號為太平呂氏宋之中葉有以經學教授千里中者曰遵遵之子曰質質之子曰迪功郎師愈仇家搆飛語中其長子約而達及之父子同時與龍川陳公俱下天獄次子皓先以賑濟受知倉使朱文公奏補郡文學用漕爲再上春官時年二十有四叩匭上書乞納所得官贖父

兄罪垂白無例孝宗正色曰義事安用例立命出之縲坐得釋者五十餘人幼子源是為府君五世祖累贈通直郎高祖諱介曾祖諱羔皆承節郎祖諱堃承信郎父諱懋咸瀋陽人嘗與計偕試禮部入 皇朝版授知永康縣至元十五年也母何氏知樞密院兼參知政事夢然之從孫女府君少嗜學至老不懈讀書務窮理而于百家數術靡不旁通其說平居致養于親為具必豐族人不能自食者月有廩年當入學者家有塾列為成規守而不廢子女婚嫁必擇故家名族未嘗論財接賓友情文兼至各盡其歡而止鄰里有急必周之歲大侵為粥食飢者所全活以千百計至于自奉乃極簡薄衣無美飾食無珍味器用節完出入無僭從惟以一童挾策自隨人望之蕭然山澤之癯也其恭儉出于天性孝友行于家庭仁愛及于宗族鄉黨可見



者如此而又多材能遇事明敏所處必中于理衆咸厭服為人  
排難解紛勇于赴義不以為憚里中無賴之徒或假私讎誣平  
民箋送所及甚衆為之力辨于官以免人尤德之初知縣公適  
值南江新附官府未立毅然出任縣事而弗辭既撫定其民使  
無失業且為之捍衛以備非常人恃以安及朝廷置真令即奉  
身而退蓋志在用權以全其鄉井不藉是為進取之階也其後  
大盜竊發官府追討復強起之以為總導府君甫踰弱冠實預  
在行身踐重山密林荒昧阻絕之境而直探其巢穴事平口不  
言功識者推其雅量晚益務闇晦自號水西翁云前娶朱氏鄉  
貢進士環之女先四十年卒後娶趙氏參政事知資政殿大  
學士順孫之女先若干年卒子男三人長曰梓本伯兄之子次  
曰權曰機皆朱氏出府君既早失內助二子又幼弱因鞠梓為

已子俾持門戶事而遂昇以知縣公兩遺田宅權既長遣從鄉先生許公益之受學入華山中業成未及見于用而先府君十五年卒無子府君以繼體之重為之斬哀三年仍命以機子烜為之後而機亦先府君三年卒女二人適同邑陳至寶東陽胡道隆孫男七人熙忠燧炯輝烜煥女四人曾孫男六人女九人府君生于宋咸淳四年戊辰閏月三日巳卯卒于今至正六年年丙戌二月三日壬子享年七十有九諸孫以其年十一月三十日癸酉奉柩合葬于東陽縣西部鄉西郭先室朱氏之墓而以狀來謁銘昔歐陽子有言為善無不報而遲速有時予觀水心葉公銘廸功之墓曰治生能富教子能賢後溪劉公銘通直之墓曰宗族稱其孝友鄉黨敬其仁義蓋呂氏之積累其來久矣至府君家益昌而其材又有足用者苟出其緒餘稍自見于

世宜不止為一鄉之善士而已。願乃歛藏弗耀而優游以卒歲。豈不曰為善之報自有其時乎。府君二子雖早世而孫曾蕃衍。生今昭代必有能自致顯庸而大亢其宗者。為之銘以勗之。且以俟也。銘曰：

有伏必興，斯理之常。惟德之厚，其流乃光。于嗟府君，隱居行義。施澤于人，而不有位。保其世德，望于一鄉。繩繩子孫，積善之祥。亦既有子，胡又天閔。百年之積，鬱而不發。是繼是述，在其孫曾。尚克有聞。天寵是承，貽思所加。責及寔寔，惟銘可徵。勒此貞石。

富陽朱君墓誌銘

富陽江沂流西行三十里，東山之下有隱君子曰朱君。既沒，且莖其孫天麟以父命奉先友鄉貢進士陳君杞所為狀，請文為

銘按狀君諱伯清字源之世為杭之富陽人曾大父安禮大父  
彞父起南俱隱德弗祖君少無他嗜好唯劬書至忘寢食群居  
誦說務以道義相切磨不專取為舉子業也叔父起渭調太平  
當塗尉携以謁郡守高侍郎衡孫侍郎前輩慎許可見君丰姿  
秀整叩以所學甚器重之會科舉事廢君因得肆其力于聖賢  
之遺言而為詩文益就平實平居訓其家以儉而于周人之急  
無所靳歲所輸二稅恒先期畢繼之者以自後為耻有聞訟輒  
開諭之使解去里中賴以無事民至有不識吏者潁江故多盜  
聞君之風相戒無敢犯容舟下上必以君為依歸縣尹李侯賢  
號剛介罕與人接慕君之為人款門請見詢政事得失君為言  
漕權及興造碩買之病民者數事尹施行如君言人至今稱之  
初君所與為師友皆知名士後多取科第或班朝行君故未脫

塲屋不以寔欣感也又嘗與故尚書右丞葉公李同事宋太學  
博士施先生南一時先生之門惟右丞年最少君察其有志氣  
以語當塗府君厚遇焉已而右丞以京學生叩閣言斥時宰刻  
市田變楮諸新法非便得罪投漳州朋從懼莫敢省君獨往與  
之訣且為具食飲服用之物俾所親送之二千里外其免歸也  
君迎之江上無一語相勞苦第勉以風節自終至元間右丞用  
薦者驟居政路士爭附趨恐後頌漠然若未始有雅故者右丞  
念君不置數遣迎致之卒謝弗往由是終其身不有仕籍人尤  
以是高之君卒于大德十一年十二月某日年七十有二配吳  
氏先君若干年卒泰定某年某月某日合葬于所居南三里馬  
鞍山之陽子男二人長日文韶使來請銘者也次日應申巳卒  
孫男四人天驥天騏天麟曾孫男九人女四人銘曰

有往而弗返莫予遏也有發而弗舒莫予竭也茲昔賢之細事  
世駭以為深也幽幽其潛昭昭其晰也陵耶谷耶不尚有揭也

鄭胡君墓誌銘

鄭胡君以至治二年六月甲午卒年七十有三其又明年某月  
某日塋城西南六十里亭嶺下前事諸孤哀經哭奉塋生復禮  
之狀踵門再拜請文為銘予為之荅拜且辭則又再拜固以請  
乃次而銘之按狀君諱珠字伯玉本黃氏子生七年後胡氏胡  
氏自君之曾大父祖季大父桂發父德潤皆未有仕籍至君始  
以材見推擇為郡列曹掾非其好也用久次司郡倉積勞當序  
遷輒棄不就其居家奉母孝率子弟治田廬生產悉有法有餘  
財未嘗資以為俚俗華靡豪畎事尊官顯人慕而與之交不肯  
為翁翁熟然于故舊煦煦有恩歲時問巷相遇雖賤夫幼童必

跋跋然與為禮有疑其矯飾者迨君病革姻黨朋從來候問度  
且弗起咸有戚色君曠息垂絕猶舉手加額曰惶恐惶恐疑者  
乃釋然服其出于至誠君平生無他好玩獨嗜蓄古法書名畫  
持以售者歸其直累百金無所靳畧益聚書構精舍小溪上延  
師儒教諸孫為舉子業塋地實在其西十里君所自辨定也蓋  
君子管郭之學甚遠云君娶鍾氏子男六人曰元堅曰元厘曰  
元彞曰元基曰元堂曰元圭女一人未笄孫男十有三人鑄鑑  
鎮鈞錡銘鉅鑄鑑銳錫錯鉉女十人婿曰俞祖錫張景松餘在  
室曾孫男二人宏翁與翁嗚呼予聞有隱德者必有後觀君之  
自信獨崇非能以利澤昭被于人而子孫茂衍若是宜有隱德  
矣其所恃以為不朽者獨銘也哉銘曰

惟古宅兆祇占從違允矣胡君敏志不疑我擇我藏匪卦于著

有封斯隆有潛弗耀有變其銘嗣人之思

蔣君墓誌銘

潛弱冠時及石先生之門聞先生當宋景定成淳間執弟子禮者恒以百數碩生晚不得廁其列然竊心慕之先生歿十有六年而潛為諸暨州判官始識蔣君陶朱山中扣其師友之淵源則執弟子禮于先生者也君不以輩行自高言必稱同門若嘗與游與居者焉會有詔詔賜高年帛郡檄潛奉以從事潛方躋君之門而君已死將墓其子果以狀來謁銘潛不得辭按狀君諱朋龍字飛卿蔣氏由漢兗州刺史嗣二十四世至唐尚書左丞冽又十七世至宋國子監主簿某監簿生處州教授穎教授生國子助教蕭助教之子曰一德君之高祖也曾祖諱嗣與祖諱允參父諱亨之皆不仕其自宜興徙越之諸暨迨君九世



美君先娶姜氏前三十七年卒有子一人果也後娶楊氏有女  
二人長適胡一中起進士為紹興錄事次適趙深孫男三人曰  
某曰某為兄進武校尉純後曰某初助教君無恙時有異僧空  
入其室示以八字曰傳燈佛祖涅槃舍人揖而與之語弗頷而  
去他日以其言驗之壽畧如瞿墨氏其歿則雙林唱滅之後一  
日也自是君之祖若父得壽同歿之日又同君之死也夢其父  
曰燈燈續傳不自我後不自我先寤而謂果曰吾先世之聞于  
淳屠氏者固非所敢知以今之年明之日徵之殆與吾夢符吾  
其逝矣即索紙筆為書與親友訣翌旦正襟危坐奄然而逝泰  
定四年二月十六日也享年八十有一葬以某年某月某日墓  
在某鄉某原銘曰

自生之不齊兮寔命自天修不可強促兮短不可苟延天胡厚

君之家兮賦予之獨專死之日兮生之年一門四世兮弗後弗先吾固知命可受兮不可傳天者之難必兮孰測其然于嗟乎君兮尚歸夫全

青陽縣尹徐君墓誌銘

君諱彞字和甫姓徐氏其先衡州龍游之徐係出偃王而代祀遼邈莫詳其世次君曾大父曰誼甫有隱德大父曰克威以疾廢里豪乘間霸并其家生事日削父曰進始成童能隱忍激勵卒自奮以致先厚然喜施與又樂道人善以長者稱初娶越邵氏因徙家蕭山之漁浦尋又徙餘杭而占籍焉繼娶陸氏俱無子其子男二人女一人皆季氏出君最長德祐元二從父避兵踰濤江夜夢神人告曰趣返否且及難既寤遂西還已而兵從東方來人皆曰天既俾徐氏有後又謹護之積善之

報將是在乎君性篤厚而遇事警敏少嗜學能為詞賦既又從師受經用舉者試吏平江精思竭力雖憊不休人或譏其過君曰事無少不可忽也軍校有不法事在郡府君視其牘議不少貸漕運官屬恃其品級已高尤恣橫凡姦私殺虐執事者率畏憚不敢竟其獄君一一具上諭如律民間以匿朱張財物多無辜坐逮者君力為辨析免男女為奴婢者若干人憲府以時所引用斷例不一求文學吏整比之君定自中統訖大德為之綱目條分理貫簡而易求約而可守覽者便之既書滿行中書省署君歸安縣典史白雲宗僧沈某冒名霸凌官府有信其意者兩人將真之死地兩人之怨家私鄰女不得殺以滅口棄尸桑林中事覺陞使他辭引兩人傳致其罪君將直其寃吏持不可曰沈公意執敢拒也君盡立群吏于前語之曰吾能死不能

溫殺以求媚于人會使者行部君等自出之沈之徒有僞某者  
通民婦為其夫所擊斃而銜之適有遺奴殺者賊弗得憎為飛  
書誣其夫及有他怨隙者七人故以書隱避卒家七人中或以  
罪黜卒得之曰此警跡也因捕治不疑君察其寃而七人者皆  
卒店莫敢易辭君命去其粗械始垂泣自言今以左驗已具難  
之君服契衣佯為賣卜至其處悉得七人以已物實賊狀取其  
家餘絲布數升析縷比以無不合釜竈及他物存者又合僧乃  
服罪七人者得直已而獲其賊于武康人始歎服焉縣獄舊有  
男以醉死弟自經死誣平人者獄已成君親為訪求其實悉生  
之鄰縣安言有逐其妻之子而夜死于盜者意其子也巡官捕  
繫而煨煉成獄且他取衣物為證君為踪跡其事或驚惶以實  
自首乃出其子而坐巡卒及行貨者屬歲大侵君夙夜施其極

救之術凡所給宣過厚日無以法害吾仁也已代去省臺猶以  
荒政護之陞平陽州提控案牘以內憂去服除遷海道都漕運  
萬戶府提控案牘方運次里居而經理法行君以書論田不實役  
不均之弊累數千言宰臣領其要者得書大喜俾乘傳白于行  
省時列郡守咸以田事期集爭欲得君以佐其事君佐常州又  
佐池州所行一如其言他郡或取法焉未幾以漕事至京師中  
書奏君以九品官仍為本府提控案牘兼照磨承發架閣考漕  
法利病下至占候探測著海運紀原七卷後有掠其美以自名  
者非本書也尋復以漕事至京師詣都堂獻書數萬言條陳漕  
運之弊當更張者事十執政得書移行省用其七至今賴之久  
之以職官入福建帥幕由令史為提控采列郡圖籍撰福建總  
目若干卷用例授將仕佐郎建德路總管府知事言當世宜急

行者其要有六府上其事轉達于中書雖不報而隱然用其說  
人或指之曰是徐某所嘗言者時朝廷方選用重臣宣撫兩浙  
江東君懷時政閑失閑大體者為九策以獻會其使還他官不  
果行用覃恩授承事郎池州路青陽縣尹為治專務教養其民  
縣人方某為割地以廣學宮章某為捐貲建惠民局有司歲徵  
民輸荒田租為田千四百頃縣人甚苦之君寬為之限民墾  
闢教以修坊置閘而穀見田歸其實行視他民田之阻山瀕江  
者俾因地勢為蓄泄以備旱澇歲飢則輟已俸倡眾以濟之民  
有告四十人同發其廩粟者吏欲准強盜論君曰吾方憂其死  
而食之彼乃以求生而抵重禁當用法外意可也悉咎而遣之  
旁郡事類此而有瘦死者憲府問君議召其長吏切責焉隣縣  
銅陵人爭魚池三十年君數語而決尤以是知于上官滿代而

歸留君吳之閬門無後仕進意結廬植花竹日與賓客觴酒賦詩或乘興獨往徜徉山水間自號可道人元統元年六月忽構疾諸子懼或請禳君止之曰吾猶未也果有異則止藥弗服時是矣已而有廖久之乃以疴命止藥作遺書及戒其子佛事不必作親舊致賻不可受須臾端坐言曰年六十五不為天官正七品不為小得正而斃焉幸矣言訖而逝十月六日也享年六十有五娶謝氏先二十九年卒繼潘氏子男五人曰震餘杭縣學教諭曰恒出後德清鍾氏曰濟曰孚曰良紹興和靜書院山長女一人適章光祖孫男五人思誠思恭思溫思義思文女五人俱未行震等遵治命以其年十一月某日歸塋錢唐石屋鄉先墓之後初君未及仕而父沒哀慟至頓絕母氏卒于官第晉亨以憂病歿君曲盡調護之力焉君讀書務以致用不屑屑

于章句作詩善體物寫情凡所著有端本書忠報錄自警錄可  
可抄書各一卷居任集二卷集教方三卷及家譜詩集並藏于  
家史學大綱折伏比事各十卷行于世而所謂海運紀原福建  
總錄皆列于官書予方樂聞君行事而良以狀來謁銘敢不諾  
銘曰

儒者之效久矣弗白矯矯徐君東茲諒直施于有政鶴然厥蹟  
胡不卒施而有遺策用銘告哀勒表玄宅

### 應中甫墓誌銘

中甫應氏諱本中甫其字也宋南渡時六世祖確由汴徙錢唐  
因家焉父普受知淮閩李公庭芝補進武校尉宋亡李公死遂  
輜晦不復出中甫生而秀異稍長能自植立治家務勤儉與朋  
友交以信好為人排難釋紛而軫恤孤寡人以此稱之始中甫



與子同年進士前史官楊公載共學明于禮春秋喜為歌詩頗有志于官進而弗遂年甫三十趙魏公以集賢直學士提舉江浙儒學辟主教仁和縣辭不就後游京師集賢大學士王文定公力薦于朝年已六十無意于仕進歸隱西湖上日與高人勝士徜徉山水間遇奇書必厚其植而取之所積甚富平居能自攝養筋力至老不衰手未嘗釋卷每秉燭至夜分乃寐間有所得手抄成帙善鑒定古書畫一時名人咸服其精旁通數術方技而最深于醫晚遂混迹于藥市至正九年七月二十八日卒于海昌之寓舍享年七十有八以其年閏七月二十五日返柩塋于錢唐縣水月鄉葛嶺之原先是中甫在海昌俄一日泛舟小至錢唐徧謁親故携其甥某登葛嶺指示以所卜樂丘之向背僅適旬浹而竟不起屬續之際神思不亂屏去婦人惟留諸

子侍側告以平生俯仰無媿即死汝輩慎勿徇俚俗追薦之說也語畢而逝娶朱氏子男四人才兩預鄉貢用特恩授嘉興路儒學正偉嘉興路總管府司吏貞晉陵縣儒學教諭毅仁和縣醫學教諭女二人適張天麟俞仁榮孫男五人女四人中甫所著有三家禮範辨一卷注春秋世紀一卷五七言律詩五卷集驗方一卷人多傳之蓋中甫素峭直寡合不屑苟售然爲子教子及見其成而身食其報祿雖未豐所養者志既壽而康遂以考終亦可無憾矣予獲締交于中甫甚久才也又辱從子游中甫之破也予方告老將退休于田里使者以召還之命追及予于錢唐敦迫就道無從申總帷之一慟而才也跣走造予傳舍奉中甫治命以銘爲請哀朽荒疎不足任付託顧義不得辭銘曰生也直時于人積也厚燕及于子孫無悔無尤卒歲優游銘以

焯于幽

廬州路儒學教授致仕王君墓誌銘

君姓王氏名某字則之後即其字以為名廬州麗水縣人也曾祖德昭祖仲達父君舉俱弗仕宋咸淳末君甫弱冠試鄉郡待補太學諸生德祐元二太學事廢迺悉弃故所習舉子業歸讀書山中為道德性命之說殊無仕進意至元三十年部使者秋公桂始起君為縉雲縣教諭遷廬州路學錄陞蘭溪州學正用累考及格上名吏部而君遽以休致為請授將仕佐郎廬州路儒學教授致仕至治二年也于是君之子釋亦以儒學官借補潮州揭陽縣湖口巡檢命下之日父子皆公服前後置褥位望闕謝閭里以為榮會釋已迫戍期有司給驛券俾就道釋以君年高久未忍去君語之曰吾家本寒儒未嘗為國家效分寸之

勞而一門之中叨蒙誤恩如此願吾已老矣其行矣第思報稱  
無以吾為念也釋至揭陽歲餘而歸不一月君屬疾甫數日遂  
不起聞巷之人又莫不深哀之娶潘氏子男二人長即釋次某  
女二人劉某趙某其婿也孫男女各二人君之在縉雲愛其山  
水之勝因家焉晚復築室城東關地引泉樹佳花美竹日與學  
者游息其間以詠歌先生之道其地有忘歸臺君倦憇臺上謂  
釋曰吾死必歸吾骨于是釋識謹之君既卒以治命奉柩塋其  
處其卒以泰定元年九月二十一日得壽七十有三塋以三年  
十一月某日君平生所為詩之釋方彙次成若干卷塋于家銘曰  
荷嗟王君與道為期出也或遇其歸處也弗佚其私蟬蛻春融  
樂也熙熙段吾其室昭以銘詩

中憲大夫淮東道宣慰副使致仕王公墓誌銘

公諱良字止善姓王氏越之諸暨人曾大父諱天祐大父諱一  
榮俱弗仕父諱理用公貴累贈朝列大夫秘書少監都騎尉追  
封太原郡伯母祝氏方氏並追封太原郡君所生母厲氏贈宜  
人公少受業郡庠篤行勵學克自植立每慨然以康濟為志故  
秘書少監凌公時中為江北淮東道肅政廉訪司知事雅知公  
辟為書吏反遷淮西以新制南士不得入憲幕兩淮都轉運監  
使司書吏督辦富安場歲課場距海遠潮不時至鹽丁負水取  
漕力疲而賦不充乃為相其地形鑿渠以通海潮公私咸便之  
考滿調將仕仕郎廬州錄事司判官淮東道宣慰使司辟為今  
史掌織染之事所轄官府久廢不治乃日臨視之為脩作坊募  
工匠至于攻金治絲設色具為區處迄今守為成法兩淮鹽綱  
病于運河淺淤事聞詔遣都水監官疏治之公徒分閭至淮安

之盤城有司部役夫三千束手以俟都水之來公言不宜坐靡  
日食促令興工仍立法每十夫一治炊爨九祿番歸日所穿廣  
四丈修一丈深五尺比都水至河可通舟者已四十五里遂自  
新興五祐兩場屬于高郵次第訖功而他州役議猶未定乃俾  
悉用公法行之調將仕郎峽州路總管府知事入江浙行中書  
省為掾史會

朝廷遣使復立諸市船司公從之至泉州建  
言苦買舊有之船以付船商則費省而工易集且可絕官吏侵  
欺括克之弊中書報如公言凡為船六綜省官錢五十餘萬婚  
升承事郎建德路建德縣尹以方郡君憂不赴服闋擢兩浙都  
轉運鹽使司經歷越守王公克敬以郡民苦于計口食鹽言于  
行省未報而王公為轉運使乃俾與新守于公九思集議咸謂  
宜損損其額以紓民力沮之者率以為有成籍不可改公毅然

曰民實寡而強賦多民之錢今死徒已衆碩重改成籍而輕棄民命乎且浙右大都商旅輻輳未嘗以口計也移其所賦散于商旅之所聚何不可乎于是議歲減越監伍仟陸佰餘引俄有旨改畀王公以湖南憲節後轉運使復排前議公以去就與之爭丞相脫鞅荅刺罕公聞之亟遣留公而議遂定被本司檄分治刺東力除私販誣指之害按劾書吏奏差尤無良者黜之兩微賊為錢萬六千餘緡懼而以賊自首為錢萬三千七百餘緡丁少監公憂服闋擢海道漕運都萬戶府經歷越之官糧所入海運者十萬石城距海十八里歲令有司拘民船以備短送舟人為之失業不足則勒陸居之民厚直轉僦以給之程期峻急吏胥得並緣以害民乃至海次主運事者又不即受而有折閱之患公抗言曰運戶既有官賦之直何復為是紛紛也衆莫能

奪乃責戶責自買運送之舟運艘為風所敗者例當覈實而除其所隔之糧文移往還連數歲不絕公取吏牘躬自披閱除其糧二十五萬二千八百餘石鈔二百五十二萬二千五百餘緡布囊一萬九千有奇而運戶免于破家遷承務郎揚州路總管府推官以屬宜人憂不赴服闋除江洲行中書省檢校官有詣中書省訴松江富民羅氏包隱田土為糧一百七十餘萬石沙溝為鈔五百餘萬緡者乞立行大司農司勸農營田水利總管府以糾察追收之中書移行省議擬遣官四員踏視其地而松江獨當什九公至松江七日而歸援古證今條陳曲折以破其妄且言其意不過欲多稽田糧誦鈔以味

朝廷之聽而報宿怨諱創設牙門為徽名爵之計耳萬一民心動搖患生不測豈為國家培養根本又安長治之策哉同列聞



公言皆相顧失色公處之泰然他所遣官聞公歸亦皆還行省以公言上于中書事遂寢還廣州市舶提舉輟俸資造庫屋船商欣然出私錢為助不逾月而告成先是吏胥恣為姦利凡船貨擇其善者出而售之不善者積久不售公始為設法均配立號募商人掣籤取物庫藏為之一清居數月除江西行中書省左右司員外郎吉之安福州有小吏誣其民欺隱詭寄田租九千餘石者初止八家前後四十年株連至千餘家行省數遣官按問吏已伏其虛誣而司屬之喜功生事者復勒其民具報實有合徵之糧六百餘石憲司累按詔條革撥莫能正也公到官首言是州之糧比九經理已增一千一百餘石豈復有所謂欺隱詭寄者乎准憲司所擬可也行省用公言悉蠲之州人相率為生祠以報撫之金溪有陸氏三先生祠豪民據其屋而

奪其田陸氏子孫三走訴于京師竟不得直公按其籍使悉歸之公所至興除利害多類此其詳見于省臺案牘及安陽韓先生國子監丞陳君旅諸公所為善政記惠政歌者不可殫述也公在江西歲餘年甫六十有六拂衣徑歸遂以中憲入夫淮東道宣慰副使致仕家食者五年扁所居室曰止止齋乃自號鷗遊子以見其志云公質貌魁梧心地磊落讀書務明理以致用不苟事言說為名高弱冠時出遊錢塘與浦城楊君戴廊川劉君汝反善論作詩宜取法古人之雄渾而脫去近世萎靡之習間挾其所為文登諸大老之門最為隆山牟先生永康二胡先生吳興趙公已酉即公所賞識公處家庭肅官臨民各盡其道平居慎重寡言故言必有中至于委蛇進退之際莫可得而瑕疵人尤以為難能公卒于至正八年正月癸亥其將終也神完

志定無異平時正冠肅容端坐而逝享年七十有一以其年七月丙申塋于州東長寧鄉之龍隔娶劉氏封某郡君子男三人長仲楊用公蔭為揚州路如皋縣主簿次仲廬福建道宣慰使司都元帥府令史次仲淮大寧路儒學正前卒女三人適方泗陳嘉績虞尚忠孫男十一人女七人公既塋之明年潛以久居詞林老不任事納祿而歸抵家甫一日而有召還之命于是仲楊仲廬相與謀來請文為銘而使者與仲廬至同日敦迫有嚴未遑即如其請載念納交于公逾四十年知公為深不可以遂已也乃以退直之暇追記其所可知者論次而顯詩之以達焉銘曰

惟士先志惟官先事志不可奪事乃有濟表表王公時之偉器抱負千百出僅一二竭蹶而赴助躬盡瘁拾級而升不懈于位

好是正直周而不比表裏洞達初終一致古今殊時弊與政異  
公起文儒敏于吏治詢其職業匪專撫字士飲其德民酬其惠  
所去見思如百撫吏沒世不忘仁言之利修涂九軌方駕而稅  
用雖未竟志則已遂薦斯銘特于封陔有之倡之在爾未畜

承直郎潮州路總管府孔君墓誌銘

君諱濤字世平姓孔氏先聖之四十三世曰機周曲阜今襲封  
文宣公贈兵部尚書仁王又二世曰宋給事中贈太尉道輔又  
二世曰提舉江南西路常平茶鹽公事中奉大夫傅南渡初自  
曲阜徙衢州又二世曰迪功郎監漳州南嶽廟贈少傅行可則  
君之高祖也曾祖諱從龍迪功郎祖諱應祥從政郎主管尚書  
刑工部架閣文字人 皇朝隱居弗仕考諱純西安縣儒學  
教諭以君貴贈承事郎濟寧路同知兗州事妣陳氏贈宜人君

幼有異質五歲知讀書八歲能屬文深聞公愛其警敏俾受業于默齋留先生間出游郡庠別駕陳公剛中大奇之年二十舉茂材異等一時名士大夫如永康胡先生吳興趙公巴西鄧公無不器重焉婦翁徐聖予從事江東憲府携君以行丞郡廬公柳城姚公前後持使者節君皆為之執弟子禮由是學益進聲譽益進用察舉署宣國路儒學錄事

朝廷著取士令延祐

元年曲阜首以君充賦東平曹公子貞得君而為古文致賞不已是歲以鄉薦上春官所對傷太直且微譏切主司竟不合用特恩補深陽州儒學教授君既新其廟學而士多苦于徭役為白堵臺府悉蠲之七年再貢于東平未行江潮行中書省辟為祿曹史務雖劇君隨事緩急閑白以行訖無所壅抗之商稅比歲不登俾君起辦旬月而集時宰以為能而風紀之司頗欲

尋其過誤後乃察其無他事遂釋至治三年復試東平第一以  
泰定元年賜同進士出身用有官赴授從仕郎平江路崑山州  
判官未上丁內艱服除改吳江州判官用覃恩轉承事郎被省  
撤點浙東諸倉庫餘姚因仍前契糧不宿倉官吏惶駭莫知所  
為君知而不發使自為之所糧既充而官吏亦得自適乃皆感  
服君始視州事因有張甲以擅殺盜錢已坐逮獄已具君謂所  
殺非平民卒貸其罪歲飢民多事剽剽君設計捕致數十人謂  
此皆迫于凍餒而然不可以強盜論杖而遣之州瀕太湖故集  
埭以禦水繕修無時病民特甚君為改作使可支久民力以舒  
水嘗暴溢君跣禱于市橋移時水降人情以無恐而四郊之外  
有溺死者君親收瘞焉鄒州飢憲府俾君往賑之金活甚衆御  
史蓋公耘夫率同院舉君治績為諸州最未報會霖潦害稼君

所檢視當免輸田租者衆使者覆按左右承風指誣君私庇之  
居無何誣君者以賄敗投遠方而君得調桂陽州判官天大旱  
禱于神弗荅而探獄有寃出其無罪者三人乃兩廣寇竊發君  
獨任軍旅供億而民不擾而軍食亦無乏絕州民與蠻獠雜處  
素號難治知州方思廣以貪虐啓其爭殺人寔弗問反加告者  
罪君與之辨莫能直即日辭印綬去韓公德新乘康車按是州  
劾罷思廣勉君復留君單騎直抵獠穴諭以禍福皆警伏聽命  
人賴以安秩滿遷潮州路總管府知事用入廣陞承直郎先是  
君在桂陽感末疾而歸疾稍間潮州近吏至乘傳行次武林驛  
疾復作移寓龍山保和僧舍一夕卒至正二年四月十七日也  
年五十有七妻徐氏封宜人子男一人思構女三人適張日新  
陳煥盛麟君易簀之夕惟思構及季女在側發書笥得遺訓數

十百言凡身後事區處甚具思備遵治命奉柩涉江還衛州以  
其年七月四日塋西安鄉孝悌里先墓之次初太尉世父既襲  
文宣之封五世至端友與中奉公同南遷由端友至洙襲衍聖  
之封者又五世至元十九年秋七月有 詔令洙赴闕祭閭

公以族長被命與俱中道而返洙獨入對廷議俾仍嗣襲洙力辭  
乃以為國子祭酒提舉測東學校洙所居室扁曰存齋君惜其  
以存自號而不能欽承 德意存其封爵因自稱曰存存齋

云君所為詩尚俊邁文渾厚不事纖巧有存存齋藁未及詮次  
惟闕里譜系一卷為成書君九歲時祖母黃氏有疾露宿密禱  
七歲壽一紀以延祖母之年疾隨愈後十年乃終人謂君得年  
不永所禱殆有徵焉祭閭公及兗州府君相繼下世第洙方孱  
弱君獨治喪塋祭貨產皆委而不較且接近比請授以官存齋



子崇安尹楷卒于杭君輟錢營護歸葬其子公濟暨兩女淪落民間咸訪求得之今公濟已強而仕兩女亦各有家公濟死剝地為報却弗受其孝友出于天性然也郡文學孔某東出永嘉族人以其疏遠而弗之親適以事置對憲府時君方八歲力為求直而出之同里徐伯潤託其息女於君而殁君鞠之如已子既長為嫁于士人術士顧知幾來謁遠以疾亡君為具衣衾以飲而緘其行橐惟謹妻子聞訃至而恚以授之皆感泣請以其術為獻拒弗納有同與計偕者見黜于有司貧不能歸君為貸錢一千緡于富人而代償之其人後亦取進士有祿秩或謂可責償矣君不聽而焚其券其急于人之患難窮厄多類此胡先生沒君集同志之士弔祭而上私誄焉默齋之喪主辦尤力深水州判官朱性初與君聯事于省戶到官未幾而卒良遇杭君

迎于其家而為位以奠親舊皆感動爭來歸時其篤于師友之  
誼又如此君與人文歡然無間然尚氣不阿有過必面折之聞  
者若不能堪久乃服其識量平生無苟取嘗龍書大藏經有旨  
賜幣亦辭弗拜家居不事生業有書伍千卷而已君之墓也思  
構已記歲月納諸墳復以狀來謁銘予締交于君最久且親自  
謂知君莫予若而狀之所述多予未及知若予固不得而畧也  
庸備著以為序而銘以係之銘曰

古有六行以教萬民比屋可封孰非金人矯矯孔君生今之世  
無待而興六行兼修直道以行視險若夷出其緒餘卒不大施  
爰擇斯藏里曰孝悌銘彰其存用諗來裔

金華黃先生文集卷三十四

金華黃先生文集卷第三十五

續卷三十二

臨川危素編次

魯易劉耳校正

墓誌銘

延福太監張公墓誌銘

故延福太監張公世業儒而兼善乎道家之言洞達乎死生之變其無恙時嘗自製棺槨題曰爾隱欲效陶元亮自爲挽詩杜牧之自作墓誌而弗果公既歿且葬平生所與交皆一時名人其家不敢屬以銘者懼非公初意也後二十四年公之子世華以爲不可使公終泯泯而無聞乃奉狀以銘來謁按狀公諱觀字觀道其先家於淮南宋渡江之初六世祖思道由通州航海抵平江之福山港入居於橫涇遂占籍今之常熟州高祖彥奇晦迹不耀曾祖朝請郎仲有子九人俱能自植立祖迪功郎孝

德家始大父太學內舍生士元再領監舉未第而國除乃隱不仕母金氏至元丙子又自常熟徙居杭州時公甫五歲父母鍾愛甚至延名師教之公天資明銳加以勤敏師逸而功倍既長工為文尤長於歌詩不肯蹈襲陳言游戲翰墨得古人筆意善鼓琴嘗親斲琴數十張咸臻其妙性好古而習於世務於吏事譯語無所不通父母歿事繼母如所生綜理家政公私應酬各適其宜貲既日豐兄弟子姪之貧乏者周之女子不能婚嫁者資之死無以治喪者給之平居薄滋味戒家人無故勿殺能飲酒而惡沈酗四方賓客之至無虛日樽罍之備禮而已大德乙巳出游京師用薦者入宿衛於中宮扈從往來兩都靡憚其勞至大戊申中政院奏授承德郎同知江浙財賦都總管府事已酉秋八月就職僅及再暮倦於繁劇移疾辭退延祐乙

卿太常禮儀使司徒田公強起之 奏除本院判官不就丁

已宣政院奏為斷事官命下陞其階奉訓大夫不吝復辭戊午  
入 朝集賢大學士陳公引見被 旨特授延福太監陞

其階太中大夫公深以滿盈為戒乞免進秩執政嘉其廉讓奏  
允所請俾仍舊階在垂及三載中政院復奏除內正卿 不拜  
即日扁舟南歸其別業在常熟遇春和景明秋高氣清與名人  
勝士徜徉田野間或小憩縑廬焚香看畫啜茶賦詩若與世相  
忘公於醫藥卜筮風鑒地形皆研究其術惟修煉服餌長生久  
視之法嗜若飢渴湖海羽流競進所長得璇璣混合之道每夕  
露香飛神朝謁彌久益虔雷霆諸階秘文隱書悉造玄要嘯命  
風雲立應如響先是嘗寄籍三茅山之元符萬室宮泰定申子  
上清宗壇四十五代宗師劉公欲舉以自代累致書趣之遠山

公方厭人間事為佚老計辭不赴丙寅春析田業付諸子丁卯  
秋示微疾遺命并并有條戊辰七月二十八日黎明終於某鄉  
祖塋之西巷其年十一月某日葬富陽縣春明村石門天柱山  
父母墓次遵治命也公自號湖山有湖山小養二卷卷橫溪唱和  
集三卷皆刻梓以傳元配閻氏集軍節度使某之女前公十七  
年卒無子繼室陸氏公子男七人世華陸氏出也女六人孫男  
十八女六人嗟夫市朝之人入而不出山林之士往而不返之  
二者皆過也而況賢愚貴賤同寓形於宇內能無憑生怛化者  
幾何人哉公於進退存亡之際皆可以無憾是宜銘也已銘曰  
柱下之史漆園之吏蓋不必於不仕而不都予顯位卓哉張公  
智圓行方搏扶搖而直上依日月之末光人方瞻其羽儀歎遠  
翥而高翔公之自處不老不莊曰予之先有從游赤松之子房

委蛻茲丘其封若堂欲知其人瞻此石章

中大夫延平路總管韓公墓誌銘

公諱國賓字君玉姓韓氏世居蔡之信陽其先以材武仕宋曾祖諱斌忠訓郎祖諱伯榮以武功大夫總軍裏樊考諱興祖親國步日盛歷數有歸遂隱不仕公身長七尺美須髯多藝能尤善騎射不屑為文字之學而善談論古今事至元十一年丞相伯顏平章政事阿朮奉

詔南伐師次鄂州都統制程公鵬

飛舉本軍來歸公以將家子列其麾下戰數有功十三年署管軍總把尋以兵屬黃招討世雄先是大軍度梅嶺下廣東十四城公皆預在行未幾聞軍來逼廣州公從世雄守梅嶺戰屢捷獲其隊長遂攻破南雄韶州率舟師次清遠峽斷浮梁以逼其衝既平廣州而兵復起公與之戰於烏泥沙灣水綿三山屢捷



進略循州降其守將十四年遷駐隆興世雄從參知政事也的  
迷失收興國斬黃公以偏師出戰生擒三人軍次黃州公去城  
十五里而舍兵始交公直前嬰其鋒流矢貫右臂裹創力戰而  
黃州平十五年從世雄入覲賜銀符真除忠顯校尉管軍總把  
仍賜金織文衣以旌其功十六年程公為行省參知政事公從  
之討五穀諸蠻馳傳入奏邊事還領諸翼拔突軍四百五十人  
夜焚息林砦遷索羅砦之氏使去巖險而無所憑特進諭桐木  
砦其砦主負兩銅鼓來降 朝廷方議旌擢會靖州玃狔狔  
萬蠻肆其猖獗有 旨命程公往討尋復止之俾擇人諭之  
使降公請行諸峒果皆嚮化遂罷遣諸軍命程公以平章政事  
行中書省事調公權岳之臨湘縣公既視事務農重穀興舉學  
校廬館舟渠葺治以時二十四年遷忠訓校尉處之麗水縣尹

鄰邑青田有嘯聚構亂者郡將署公為都鎮撫總麗水青田縉雲龍泉松陽五縣民義捕治之公立部伍據要害別騎前進追奔五十里而以所部兵繼之手射二十一人其九人皆斃生擒十三人斬首伍伯級餘衆聚于沙谿公手縛其二人以獻遂直往擒之獲其首亂者六人諭其民叁阡伍佰戶使皆復業未幾台州妖民反以婺之東陽玉山為巢穴既就擒伏誅羣盜相挺而起者猶未盡殄處與婺為鄰郡縉雲尤被其害公以民義會官軍逐捕之手刃五人射五人皆斃斬首一百級又與其黨遇於西巖追斬三十餘人姦執肅清而政平訟理見稱廉能大德二年陞武略將軍知台之黃巖州自州抵郡城運河皆瀕海通潮汐故有肺以時其蓄洩歲久不治公下車會大霖雨水關不行乃命考其故道為十有四凡三年而訖功民以為使同

知州事朱公叔麒故宋士也為立石紀其績人至今傳誦之  
環州署皆河水堙塞已久遂多火災公命疏浚之豪右多不樂  
公弗顧渠成而大害息凡平冤獄者三所活數十人公在麗水  
十年黃巖七年所至咸有去思形於歌謠部使者舉治行為諸  
州縣最至大七年除懷遠大將軍漳州路總管延祐元年遷定  
遠大將軍南劍路總管南劍改延平換中大夫為延平路總管  
年老去官卧病山陰谿上以信陽之游泉自號示不忘鄉土也  
七年冬十一月二十有七日卒於安寧里之私第享年六十有  
七以某年某月某日葬某鄉某原元配汪氏先三十八年卒繼  
室沈氏後九年卒劉氏丁氏又繼之子男三人長衆家奴汪氏  
出早卒次人傑沈氏出用公廩為從仕郎兩浙都轉運鹽使司  
雙穗場鹽司丞次玄劉氏出亦卒女七人長未笄而卒次適知

黃巖州劉晉亨次適王怡之次適同知東平總管府事王雲次  
適海運千戶王振鵬次適黃榮祖次適天台縣尹秦徽徽萬孫  
男二人夢生留生孫女五人公歿三十年其家始奉孫壻江漸  
行中書省掾廿立之狀來謁銘蓋嘗歷觀前史所記為循吏者  
非必其有戰伐之勞為良將者非必有撫字之責公獨負其脩  
能惟上所使孔子所謂君子不器者公殆其人乎是可銘  
也銘曰

天之降材各有其施惟材之多無適不宜公生將家逢時思奮  
被堅執銳出履行陣皇靈所加四方攸同乃授以政嗜其  
民庸拾級而升克有位序由公之材兩有文武公起列校再剖  
郡符宜有成績登于冊書作為銘章姑備闕逸惟石可泐公名  
不歿

明威將軍管軍上千戶所達魯花赤遜都臺公墓誌銘

公諱脫帖穆耳字可與系出蒙古遜都臺氏其先有事

太祖皇帝為開國元勳者曰赤老溫名在國史公高祖也

曾祖納圖兒

御位下必闕赤繼領衛兵取遼破金屢策擢

功後攻西夏而歿於王事祖察剌從

上親征西域以功為業里城子達魯花赤又從

太宗皇帝於潛邸經略中原立功尤多

太宗即位錫金符改授隨州軍民達魯花赤父忽訥襲前職以

隨州孤絕蒞治南陽府之昆陽愛鄰境却縣風土淳美因家焉

至元十三年

世祖皇帝命相臣總兵伐宋公以管軍萬戶實預在行渡江後  
加金虎符為潮廣等處行樞密院判官南土既平兵寢不用累

持憲節終於江西湖東道肅政廉訪使以長子式列烏臺貴贈  
江東建康道肅政廉訪使又以公貴贈通議大夫僉樞密院事  
上輕車都尉追封陳留郡侯諡景桓母博羅真封汝寧郡大夫  
人公以勲舊家子蚤備宿衛大德十年用臺臣薦佩金符為武  
德將軍新縣萬戶府東平等處管軍上千戶所達魯花赤延祐  
二年遣宣武將軍秦定三年轉明威將軍分城坐鎮自明而越  
前後三十餘年以老致其事公性至孝陳留府君之為湖南憲  
長有德於民其歿也相與繪像而祠焉公不遠數千里求遺像  
以歸事之如生存播紳先生皆以詩文美之公於人有善稱歎  
不容口有不善則為之不憚終日至戟手怒罵之其善善惡惡  
亦天性然也宋南渡初越人蔡定父年七十餘以事繫獄法當  
贖而走持不可請以身代又不報乃自沉於府河以死郡守為

出其父且給棺以葬嗣為郡者立廟卧龍山之麓請勅額號愍  
斗歲久廟廢而居民侵其地官不之省公撮萬戶府事慨然曰  
孝子不祀人奚以勸會使者行部亟以為言使者顧謂守令曰  
承宣風厲郡縣責也若等宣無惡乎即日使歸其侵地廟以復  
完 國朝取宋之兵至天台民婦王氏為軍士所得自誓不  
辱至刳之清風嶺置指出血題詩石上投崖而死公移文有同  
為立廟迄今不廢刻有隱士吳君與公友善嘗謂吾死得附葬  
於二戴無憾矣逮其既卒貧不能喪公輟俸貲倡鄉人葬于書  
院之側其好義又如此公為人廉介質直不喜紛華講閤之暇  
日與賢士大夫游清言推論壘壘不倦懸車之後養高城南開  
齋閑懸弓初著壁間聚古今圖書布列左右延名師教其子每  
遇風口清美輒緩轡郊外徜徉竟日或幅巾藜杖命家童抱琴

自隨散步間巷間稚童迎笑扶擁而娛亦不拒也禮部侍郎泰  
不花出守越作新學校行鄉飲酒禮迎致公居僕輔公升降拜  
起不慙于儀人皆望而敬之公生於至元二年正月三日卒於  
至正四年十二月二十八日享年八十有四夫人哈魯氏封陳  
留郡君高氏朱氏俱范陽郡君子男五人長大都以武德將軍  
襲職東平等處上千戶所達魯花赤次哈刺未仕次月魯不花  
元統元年進士累遷承事郎南陽府穰縣達魯花赤兼本縣諸  
軍奧魯勸農事次爲列國至正五年進士授將仕郎衡州路衡  
陽縣丞次完澤不花方治舉子業女四人長適宣武將軍莘縣  
翼上千戶齊伯顏察兒次適朶兒伯次蚤卒次適國子學生  
忽都達爾孫男七人諸孤遵治命奉柩歸鄉縣卜以至正六年  
某月某日葬先塋之次示不忘本也以潛於公父子間有一日



之雅奉鄉貢進士趙俶所為狀來徵銘潛竊惟自昔帝王之興  
必有命世之材為之股肱心膂披攘經營光啓鴻業功在社稷  
澤在生民故天之報施也往往使後人保其祿位以承太平君  
子無為之治其德厚者其流光豈不然哉而況公以陳留府君  
為之父武德及穰縣衡陽為之子公居其間優游自適享有上  
壽其存其歿皆可無憾顧浩之鄙陋衰朽無以贊揚萬一庸悉  
取狀所述為之序而銘之銘曰

國家之興必有世臣由本而支彌久益振時方承平垂衣當仁  
息馬投戈以文易武靖共爾位弗震弗驚禮義干櫓舒舒扞城  
賓客在前圖書左右載懸吾車長歌擊缶我弓我治世適是承  
爾仲爾季人遺一經發藻儒林踵武相接趨而過庭珪重組瑩  
生榮死哀雖歿不亡式克有譽為前人光瞻言故丘返柩而祔

念茲厥初祁連之墓

武略將軍海道漕運副萬戶曹公墓誌銘

曹氏之先出於宋名將冀國武惠王彬南渡時由汴徙吳今居平江常熟州之祿莊里者號福山曹氏最為望宗聚族二百餘人仕國朝多顯者而公之曾大父昌大父通俱晦迹弗耀父文富始以公故贈武德將軍平江等處海運千戶驍騎尉追封長洲縣子母王氏追封長洲縣君公諱某天資剛直動必由禮事親善色養以孝謹稱服用尚儉素戒子孫以為法治家井井有條積而能散私帑不蓄羨財間人有善喜形於色不啻出於己里中俊秀貧不能就學者必周給之不喜暴人之惡有小過必委曲化導使知自悔鄉人有不能制其僕子者公呼之來前喻以人心天理其子感悟卒為善人公每謂人生於世但當

設心坦夷仰不愧俯不作足矣矣必泥古人之陳迹事事求合乎識者以為名言年踰弱冠猶未有宦達之意會

朝廷創開海道以通漕運首以材選而服勞其事大德四年制授金符敷武校尉海道運糧千戶秩滿授元降金符遷嘉定等處海運副千戶公律已以廉處事有法所部之人咸畏而愛之嘗開洋而遇風濤大作舟人震駭公神色自若徐喻之曰委質為臣當忘身而徇國進思盡忠天必佑之衆莫不服其量大府或以事咨詢於衆多俟公言而後定至大三年起授金符武略將軍海道漕運都萬戶府副萬戶公數以漕事往來南北而深察其利害視事伊始凡所興除公私咸以為便四年夏部海艘八百所漕米以石計者百七十四萬八千六百四十有九盡旗官拆號令肅然舳艫相銜首尾不絕旬日之間已達海口舊

海運有神司之人恃以無恐公黜潔致禱感應如響有相之道焉

玉音獎諭宴勞錫予視常歲有加人以爲榮而公雅志恬退既受代即屏居丘園優游自適幾若與世相忘同列有惜其去者言於常路乞挽留之至治二年有旨起公爲平江等處海運香糧所千戶三年夏督運至京師賞賚尤渥

廷議復用公爲萬戶未命而公遽以疾卒泰定元年四月某日也享年六十以某年某月某日葬于福山塘之西上公垂屬續命割上腴之田一百九十有八畝築精舍擇方外之人主之俾以歲入供晨香夕燈以埽百須之費顧語諸子曰吾不以身後事累汝也夫人蘇氏封長洲縣君以禮自持克配君子嘗發私笑逆與梁以濟行者成公之志也子男八人長文華將仕佐郎平江路崑山州稅課大使贈奉訓大夫徽州路婺源州知州飛

騎尉追封吳縣男次思聰將仕佐郎兩浙都轉運鹽使司永嘉  
場鹽司丞次思溫徵事郎温州路稅課提領次思恭不仕次思  
賢將仕佐郎平江路長洲縣尉次思忠次文英次思問皆未仕  
女四人孫男二十人文華長子珪襲公職佩金符為忠朗校尉  
平江等處海運香糯所副千戶次也仙由里哈溫必闊赤累仙  
從仕郎宣政院崇教所知事餘皆未仕曾孫男三十人初武德  
府君早世王夫人躬靡他之誓教育其三子訖有成立長即公  
次良玉承務郎冀宣等處稻田同提舉無子公命以思賢為之  
後次濟滿從仕郎常州路宜興州判官贈集賢脩撰承直郎公  
歿二十有六年而珪來京師以銘為請蓋公先三世皆厚施而  
不食其報故公遭逢 聖代克承天寵久壽必發乃理之常  
雖所用未究而諸子嗣有名位適孫遂世其官餘慶所及未見

其止推本積累之自而昭示于後人所以使之引而勿替也銘  
其可無作乎銘曰

海於兩間為物最鉅孰能以才與為勝負有偉曹公孔敏且武  
出長萬夫訓齊行伍風檣浪楫若鷗斯舉精忱所格百靈呵毫  
天吳衆莫敢予侮千艘並集灌輸天府克有成績微聞常中  
傳宣宴勞秩秩構俎簞篚之將便蕃錫予公不自矜翮其遠翥  
鋒車台還不留不處為官擇人諉以印組上方用公還領  
故部公忽已仙返于帝所有子承考成躋官簿惟時聞孫大纂  
遺諸從事賢勞無忝爾祖如漢世官氏以倉庾福山之西匪堂  
伊芥史官勒銘垂輝千古

亞中大夫同知湖州路總管府事張公墓誌銘

公諱光祖字載熙姓張氏晉宣路霍州霍邑縣人其先金之官

族高祖諱桂管軍萬戶曾祖諱儀管軍千戶祖諱元義金亡隱  
居弗仕父諱衍入 皇朝任朝列大夫同知福建等處都轉  
運鹽使司事贈朝散大夫同知晉寧路總管府事騎追尉追封  
清河郡伯母劉氏追封清河郡君金氏封清河郡太君公金夫  
人所生幼聰惠稍長刻志於學而於文法吏事無所不知用父  
蔭補將仕郎提領建德在城稅務執法導職綽著能聲遷登仕  
郎主紹興之上虞縣簿上虞素號難治公以介潔自持而取姦  
胥悍卒以嚴上官甚敬異之除兩浙都運鹽使司清泉場鹽運  
循資轉從仕郎調京畿慶豐倉使用例陞承直郎運舟多覆溺  
之虞京倉有折閱之患人皆避不肯為其為之者亦鮮能道於  
吏議公材諳甚優而謀慮尤深遠處之裕如更以此受知當路  
而見識拔佩金符為松江嘉定等處海運千戶陟階奉議大夫

在官五年涉鉅海至京師者四所轉漕米以石計者總若干萬  
竣事皆有宴犒錫賚寵數殊渥上嘗命公函香祀天妃于  
成山公不憚險遠躬詣其處禮成而返祥飈泠然拜朝散大夫  
杭州路海鹽州知州兼勸農事知渠堰事公撫民有恩政不苛  
媿而善發掘姦伏人不能欺有寡婦訴其夫為人所殺罪人既  
得而莫知其屍所在公齋戒禱于神而得之官河水中時方莫  
春經旬猶不至腐敗人以為公精誠所感蓋公之究心於獄訟  
類如此即其一事餘可推而知也涖治未幾官府日益無事乃  
大興學校以淑多士三皇有廟而無田以祭則輟俸貲倡眾為  
置田若干畝部使者舉公六事俱備政績最於諸州擢同知湖  
州路總管府事進五官為亞中大夫未上俄感末疾閱數日疾  
稍間語諸子曰吾去家數千里而宦游於大江之南屢欲展省



先世丘隴竟不可得吾百歲後汝曹宜即吾僑居之所為卜地  
以葬庶他日便於祭享也無何疾復作遂以至正六年閏十月  
三日終于平江之寓舍享年六十有二公娶程氏河東山西道  
都元帥授急戰之孫女前八年卒追封清河郡君繼秋氏平江  
路總管致仕某之女封清河郡君子男六人長中用公恩授從  
仕郎建昌路南城縣丞次肅次恭次毅皆程氏出次溥化次僧  
家奴女二人長適浙東道宣慰司都元帥府譯史董德次早卒  
孫男一人女一人俱幼公天性孝悌尤篤於教子金夫人年踰  
八衰身愈康強事無巨細皆稟命而行初度之旦必擊鮮持珍  
集僚友親朋稱觴為壽盡歡而止異母弟光嗣以鞏昌都總帥  
府知事乞休致中書擬授承務郎奉元路同知宣州事未命而  
卒公哀悼不已視其子震如己子焉中等遵治命以七年正月

三日奉公暨程夫人之柩合葬于吳縣安寧鄉萬安山之東而  
以書來徵銘始公督運清泉予亦備員石堰休暇輒相過從以  
相勞苦已而予先受代去及公守海寧予適承乏儒司因得見  
公道間問公少八歲予以早衰不俟引年預乞謝事而歸公方  
嚮用不謂遽先我而逝其何忍執筆而銘諸雖然不可無以抒  
吾哀而塞其孤之請也銘曰

天之降材有萬不齊孰完於公無適不宜辟曹猥局視險若夷  
從事獨賢退食委蛇晚專一城年未及衰恢恢游刃厥間四馳  
業途方啓遽止於斯公材則多卒不大施垂休委祉嗣人之貽  
承之匪易易以銘詩

雅州知州錢公墓誌銘

公諱文煜字光遠姓錢氏吳越忠獻王之若干世曰進由嘉興

徙無錫又三世曰梓乃定居新安谿上其子曰宗起於公為高祖曾祖諱成祖諱志室父諱裕以質直好義稱國兵取常州元帥府授以官避不就晚受知于翰林學士承旨覃懷許公其卒也許公為表其墓而銘之母陸氏有子四人公其適長也幼警悟不習為童兒之戲稍長率諸弟佐其父以儉薄致充裕父歿分財均不以適底為別治喪能求賢有禮者相其事內盡其心而人不以為過於戚外盡其物而人不以為傷於侈送客數郡畢至皆歎息焉公為人精悍有膽略臨事無所回撓人有急難赴之恐後有餘粟樂以振人之窮貸則減其息糶則損其直病與藥寒與衣以為常歲饑則為粥濟餓者為糗餌給流移者其殍死者則出錢募人舁致屏處聚而瘞之平居涉獵書傳善論古今事當否成敗幾微曲折如指諸掌或有所詢謀援引裁決

言必中的與人語恒依於禮法族姻里黨有忿抑不能平則隨  
事直之無不厭服而去然不善自表襮恂恂卑讓未始以辭色  
加人故尤為人所愛重公卿大臣咸知其材許公初由中司位  
丞弼招之至輦下將署以右職公曰所不遠千里而來者為知  
已耳仕非吾本志也辭歸未幾許公卒欲用之力薦于

朝以為承事郎知雅州雅州於蜀為極邊而居西南夷之衝號  
為要地郡符殊不輕畀命下人以為榮而公訖辭不起自是杜  
門謝所還往暇日則徜徉山水間優游以自適屬疾僅一日即  
夷然而逝公生於宋咸淳八年正月三十日卒於今至元三年  
八月二十九日享年六十有六以四年十二月某日葬于其州  
開化鄉軍帳山南塢之兌岡距先塋三百步而近娶李氏先十  
有九年卒合葬焉子男七人長師顏克承其家者也次師曾蚤

卒次師中溫州路蒙古字學正次某田州路蒙古字學教授次  
師正次師義次師禮女三人婚曰吳早曹大亨葉宗亨孫男八  
人女五人曾孫男一人女一人公葬後三年是為至正元年師  
中以嘉興縣知縣君志道之書來曰志道與公同里閭而公之  
女弟實歸于我知公為最深謹具其世出行事卒葬之歲月如  
右幸序而銘諸潛竊觀世所謂砥行立名之士未嘗不欲忘貴  
遺富至誘以高位重餌而不失其所守者鮮矣公為善而不近  
名視尊官厚祿若不足以動其意其賢於人哉雖微虞君之言  
銘固不可辭也銘曰

錢故王族世有顯人後隱弗任逮處士居公初起家真二千石  
有而不居仍晦其迹泊焉以休匪佚吾私視我儔輩及所設施  
積善在躬惟家之慶用之鄉人是亦為政乘化而終不亡者在

有豐其委其承訖訖五品之石龜趺螭首薦茲刻辭式示永久

汴梁稻田提舉周公墓誌銘

須臾以休致之餘承乏詞林周君伯琦適自七閩憲府召還擢  
居次對緣僚友之契以狀屬予銘其從父提舉公之墓諡不得  
辭按狀公諱應星字辰翁姓周氏上世由鄭徙廬陵又徙饒州  
鄱陽縣之板橋里仕宋以儒起家曾祖考諱邦采迪功郎祖考  
諱灼鄉貢進士考諱塾宣教郎宣教公之第諱堂入皇朝贈翰林  
待制奉議大夫駙騎尉追封鄱陽縣子公所生父也至元十  
二年國兵南伐次饒州饒之守臣執節以死民無所依翰林公  
挈家逾城而出以自保公甫七歲倉猝之際為邏兵所得亟出  
懷中銀幣賂之既以自免又能跼翰林公所在匍匐就侍舉家  
異焉稍長樸茂恬靜不妄言笑屹如成人讀書務通大義工於

竿櫓而善心計宣牧公夫婦歿於鋒鏑而無子公兄弟四人次居第二翰林公命為之後公承其家而脩其祀事唯謹比弱冠翰林公年已七表伯兄又多病家事皆身任之翰林公喜賓客好施與當江南新附之初官府征歛繁雜公入奉嚴親不違其志出膺門戶無失其節人稱為能翰林公捐館未幾而伯兄亦卒公於喪葬各盡其禮每謂人生出處自有定分兄弟皆父母遺體苟有能顯其親者何必出於已乎服闋後二弟並游京師公獨留綜家務凡十餘年使二弟無後顧而卒成其官業者公之力也由是公之孝友聞于一時延祐某年用徵政大臣薦授汴梁稻田提舉辭不赴公既遺榮弗居日從事乎生產作業家益以充自處甚約而宗族鄉黨以困乏有請者必使滿其所欲稱貸而不能償者一無所問挾方技數術而來謁者無虛日平

居好治屋室園池樹橘數百株時與士友相羊其間因自號橘  
中居士間里少年或恃氣以陵之忍不與較人望而知為善人  
長者至正二年九月某日以疾卒于家享年七十有四卜以某  
年某月某日葬于都昌縣某鄉之黃荆山公初娶方氏繼江氏  
子男三人自誠伯強伯明女三人適張汝揖宋業黃文紀孫男  
孫男五人女二人公二弟仲曰應奎早備宿衛終於饒州路總  
管府治中季曰應極由東宮說書歷翰林集賢兩院待制丐外  
卒官同知池州路總管府事累贈翰林直學士亞中大夫輕車  
都尉追封鄱陽郡侯伯琦其子也今為亞中大夫崇文少監同  
校校書籍事兼經筵叅贊官云銘曰  
衆正之路人所同歸苟非其格吾行遲遲前人之遺其積孔有  
難進易退費用弗售雨露所濡花萼聯輝尚慰子懷風木之悲



有隕自天下貴幽室榮耀實多奚必我出惟示後人鑒觀于茲  
克協乃心勿替引之

松江嘉定等處海運千戶楊君墓誌銘

楊氏之先世有顯人宋之盛時有自閩而越而吳居澈浦者累  
世以材武取貴仕入國朝仕益顯最號鉅族今以占籍為  
嘉興人君諱樞字伯機贈中憲大夫松江府知府上騎都尉追  
封弘農郡伯春之曾孫福建道安撫使贈懷遠大將軍池州路  
總管輕車都尉追封弘農郡侯發之孫嘉議大夫杭州路總管  
致仕梓之第二子母陸氏所生母徐氏陸以封徐以贈並為弘  
農郡夫人徐夫人溫之官家女先君甫數歲而歿陸夫人撫君  
不啻如已出君幼警敏長而喜學一不以他嗜好接于心目刮  
摩豪習謹厚自將未嘗有綺紈子弟態其處家雖未鹽細務皆

有法僕隸輩無敢以其年少而易之諸公貴人多稱其能大德  
五年君年甫十九致用院俾以官本船浮海至西洋遇親王合  
贊所遣使臣那懷等如京師遂載之以來那懷等

朝貢事畢請仍以君護送西還丞相哈剌哈孫答剌罕如其請  
奏授君忠顯校尉海運副千戶佩金符與俱行以八年發京師  
十一年乃至其登陸處曰忽魯模思云是役也君往來長風巨  
浪中歷五星霜凡舟楫糗糧物器之須一出於君不以煩有司  
既又用私錢市其土物白馬黑犬琥珀蒲萄酒蕃鹽之屬以進  
平章政事察那等引見宸慶殿而退方議旌擢以酬其勞而君  
以前在海上感瘴毒疾作而歸至大二年也閏七寒暑疾乃間  
尋丁陸夫人憂家食者二十載益練達於世故絕圭角破崖岸  
因自號默默道人泰定四年始用薦者起家為昭信校尉常熟

江陰等處海運副千戶居官以廉介稱被省檄給慶結溫台漕  
輓之直力剋宿蠹培尅之弊絕無所容天歷二年部運抵直沽  
倉適疾復作在告滿百日歸就醫于杭之私廨疾愈劇不可為  
俄陞松江嘉定等處海運千戶命下君已卒至順二年八月十  
四日其卒之日也享年四十有九娶劉氏南渡名將大師鄒王  
光世之裔前四年卒贈嘉興縣君初君有三子俱未齒而天奉  
父命以弟之子元德為之子後乃有子曰元誠君卒時元誠生  
二年矣元德卜以元統二年正月某日襄祔事于泊槽山先塋  
東百步與嘉興縣君兆合君從父兄朝列大夫同知集慶路總  
管府事清孫實誌其壙而墓道之石未有所刻元德以狀來謁  
銘乃序而銘之序所不能悉者誌文可互見也君平生所賦詩  
有遺藁藏於家銘曰

弗私于佚維時之逢弗疾于用維才之通有仇其門堂構則崇其播其穫乃嗇不豐尚其嗣人勿替益隆琢石以竣表茲幽宮

上都新軍管軍千戶夾谷公墓誌銘

公姓夾谷氏諱明安答而別名思齊字齊卿其先當金之季年奮迹行陣靡有定居由大同徙南陽之郟縣又徙真定而占籍於趙州後復為郟縣人曾大父諱留乞受知

太宗皇帝入覲于西京以萬戶奉

詔僉軍彰德諸郡得八

千人隸麾下數立戰功尋出戍隨州以隨州孤絕餽餉弗繼移駐郟縣剪荆棘立城堡規模粗具俄遷戍潁州出奇禦敵人賴以安從攻安豐壽春無為親冒矢石一無所憚

世祖皇帝嗣登太寶召入扈從賜

璽書俾持以宣諭有能

率眾來歸者當酬以爵祿欽承

上旨輸忠效勤績用彌著

用丞相史忠武王薦特降金符授蓋州三項合不哥民戶達魯  
花赤改知懿州換金虎符歷懿州平灤淄萊三路總管終於淄  
萊積階昭勇大將軍大父諱唐兀以材自見於

憲宗皇帝時從攻鄂州還戍潁州建

世祖皇帝命將出師大舉南伐復預在行旣渡江取鄂又北牧  
司空山野人原天堂諸山寨計功行賞授武略將軍上都等路  
新軍萬戶府管軍千戶從其萬戶分鎮杭州卒於官父諱滿  
以忠翊校尉襲管軍千戶職沒贈武略將軍飛騎尉連封范陽  
縣男母胡氏鄭氏俱連封范陽縣君用覃恩也公鄭氏出幼有  
異質娟秀慧明可愛稍長習尚文雅雖在營壘間容止進退儼  
如承平閑閨子弟然倜儻尚氣不為崖岸與人無宿諾有過必  
面折不少貸有德必報聞其急必勇赴之由是四方豪傑之士

多樂與之交平居無事習韜略之書不敢輒廢或獵于近郊射  
則中禽則獲歸而祖割以奉甘旨克盡其歡父歿當嗣襲捧薦  
饋京師公卿大臣奇其器識不以武人子遇之被命以忠  
翊校尉為管軍千戶覃思進志顯校尉公事主帥以恭待同僚  
以和遇卒伍以嚴各適其宜閱武之際於衆中獨美風姿光采  
照人橐鞬帕首馳驟捷出列校咸指目焉其治家內外截然無  
嘻嘻之失歸自京師生事稍落以勤儉率先家人樹藝畜牧貨  
殖皆井井有條致養於偏親惟所須而具閭門食指數百無不  
充足闕故廬使極高爽日與賓客徜徉其中愛其弟思齊尤篤  
同居三十年不忍使遠去弟有子已成人乃處以錢唐西鄉別  
業凡先世故物悉推與之公在官既久一日語諸子曰吾荷  
國家之寵靈保祖父之遺緒未能圖報萬一爾曹有以成吾志

而佚吾老使得優游卒歲不亦可乎即日移文丐退主帥從同僚挽留不可則上其事于行中書省以聞于朝乃俾其長

子瑛襲見職浙西部使者交章舉公年未及謝材幹膂力皆有過人宜別加陞擢公悉辭避焉居三歲以子衍早世傷悼不已因致微疾却却藥弗御沐浴更衣而逝公生於至元丙戌九月二十五日卒於至正甲申十一月二日享年五十有九娶史氏忠武王之孫元氏縣尹某之女封范陽縣君子男四人長即瑛今為忠州校尉管軍千戶次琦用淄萊府君廕當得官未調次即珩先公一月卒次璋女三人長適永新州知州李公之子煥次許適管軍千戶趙嗣宗次許適錦州知州王公之子某孫男二人尚幼公大父之殯久在郊縣而父母俱歿于杭將扶護而往以昭穆序葬顧職守有嚴懼展省之弗時乃買地於錢唐之

東馬騰遣子琦迎大父之喪與父母同兆域以葬且築室為歲時饋祀之所公卒之月二十有三日瑛等遂奉柩祔葬其右遵治命也初范陽府君當四海合一之後田里人安邊鄙不聳得以暇日與先生長者游讀書手不釋卷公耳濡目染益自力於學延師教子各專一經諸子欲精出所長以售於有司公止之曰爾曹甫向學遽與寒峻角其勝負寧不自揆乎於是諸子愈自激勵文采彬彬士林稱焉公既葬瑛等以狀來謁銘乃披狀所述序而銘之曰

天造草昧必資羣雄四方砥平士無伐功繫公之先生逢興運兩世一時懷材並奮再傳及公際茲文明分符列鎮坐嘯名城臨詠泰和歡騰組練圖書左右嘉賓衍衍教行于家承之有人蔚乎豹變遂振於文賈勇專場襁褓儒服公曰毋庸家有世祿



印龜在棺未老而傳長歌擊缶以終天年兆啓新所有封若斧  
公其無憾歸形此土

贈奉議大夫大名路滑州知州驍騎尉追封白馬縣子王  
府君墓誌銘

故贈奉議大夫大名路滑州知州驍騎尉追封白馬縣子王府  
君以至元庚寅八月二十四日卒于宣城之寓舍享年六十有  
八即宣城郭外西南岡下治地以葬而府君元配劉氏前十有  
四年卒安厝開州已久繼室張氏後二十有五年卒尚旅殯于  
揚州至元後丁丑府君之子大有始並遷其柩合葬于府君之  
墓自為文刻石以誌焉初大有為江南湖北道肅政廉訪司知  
事提著令乞推恩其父母贈府君承務郎大名路同知滑州事  
大有張氏出也故張氏與府君同被命為恭人及大有遷平江

路總管府推官而劉氏恭人之命亦下大有既陞五品乃加府君以今官階勳爵而劉氏張氏並追封白馬縣君大有使來諭于潛曰誌所以昭世系謹歲月已納諸幽堂惟是先人勛躬樹德以承其先以啓其後者宜有辭揭于墓之原以示子孫顧猶闕焉敢以為請按王氏之先實金之宗室完顏氏世居磁州有諱遠者為金統軍使府君之父也自統君而上遭亂失其譜莫得而詳府君諱思孝字移忠幼警悟年方踰非脫身兵間東至大名居間之濮陽仍易姓王氏子孫至今因之稍長喜讀書能屬文自處甚簡薄是時國家新取中原海宇未一殊無仕遊意洎天下既平朝野無事可以出而仕而府君則既老矣惟資其子使為學庶幾他日能自振拔而大用首以材見推擇尋入江東按察司為書吏廉訪司立更留以為奏差府君委蛇就

養久之乃以壽終府君有子男四人長即大用次珪次大有也  
今為奉議大夫廬州路六安州知州兼勸農事次大應女一人  
婿曰會稽縣主簿郭郁孫男九人輔軌轍輅黼黻某某輔福  
宣慰司元帥府令史輟江東廉訪司書吏女五人適湖南宣慰  
司經歷秦從政紹興路司吏馬良中興蒙古字學正李三德餘  
未行於是大用珪大慶輔輅俱已卒咸從葬焉蓋金之將亡大  
家貴族遠親戚去墳墓散之四方而其後泯沒無聞者多矣府  
君既有以自全而不墜其宗又能教其子至於成立以備官使  
屹乃卒食其報豈偶然哉矧今大有歷官所至有聲其在湖北  
平反辰沅常潤諸死獄人尤以為明允臺府屢薦稱之其顯融  
未艾府君之宜見褒崇者不止若今所書而已雖不克親於其  
身措諸事業平生之氣尚何憾乎序而銘之俾後世知完顏氏

之為王氏王氏之在宣城皆始於府君也銘曰

完顏之支別為王氏遠邇于南由府君始惟時府君有韞弗施  
一其初終靡間險夷保厥嗣人使有祿位馳思所加草木衣被  
其升在上神遊故墟降形在下兆茲坤隅中為同穴昭穆左右  
勒辭紀實式示爾後

管軍下百戶贈敦武校尉孫君墓誌銘

君諱政其先河間人徙德州之德平祖斌當

國家肇造之初知金將亡挺身來歸于皇太弟從白荅里

罕取濱棣等州由德州軍民鎮撫佩金符克其州防禦使兼管  
濱棣軍民尋易金虎符陞都元帥久之剗解所佩虎符用白荅  
里罕奏被上命換朝列大夫仍任防禦使兼德州管軍元

帥德既隸東平行臺嚴公強以為德平安德兩縣令居數歲乃

謝去父顯始占軍籍署管軍正百戶從其萬戶軍新縣調屬他將從掠泗州擊襄陽破安豐還守楊州後從攻字羅湖蘆管寨孟家洲司空山皆有功所獲聞艦一拔其大將旗二其擊襄陽也太尉河南王寶為征南都元帥屢獎異焉後遷戍杭州遂致其事行中書省以便宣俾君襲父職從其萬戶府達魯花赤討叛賊於建寧之政和與賊相拒分水嶺擊走之追至石門赤山賊勢益張君直前與之鏖戰奪斬馬刀二移鎮慶元有司驗其所管軍定為下百戶至元二十六年奉勅為真階進義副

尉復從討叛賊於台之寧海至奉化與賊遇俘其七人得鎧仗十有四賊眾夜來劫營君急擊之得鎧仗十乘勝逐北至寧海生擒其偽國師等四人以前在政和感瘴氣成目疾去官大德五年七月也至治三年八月二十一日卒于家享年六十有一

其月二十四日葬基山鄉用寧恩贈教武校尉妻侯氏贈宜人  
子男三長毅以世襲為管軍下百戶次衡次某已卒女五長適  
管軍百戶高某次適李某次適國子生鎖住次適高某次適管  
軍百戶張某孫男二文禮文義女四俱未行教之外舅深州使  
君劉公潛父執也故深州之子貞為之求銘其墓惟孫氏自防  
禦公際風雲之會以功名自致君父子又皆親冒矢石以著其  
勞餘澤所被未有止也不可無使後人知木本水源之自報因  
銘君推及其先世而併誌之銘曰

孫氏之先世有伐功匪由門地而致顯融賞延于君復以材奮  
被堅執銳再履行陣君之所試泰山毫芒驚風在郊鷹隼莫撓  
爾子爾孫垂紳正笏照此石章永永無忽

金華黃先生文集卷三十五